

mars 1626

Vingt Six.

EDICT DV ROY;
SVR LA PAIX QV'IL
a pleu à sa Majesté donner
à ses Subjets de la Religion
pretenduë reformée.

*Donné à Paris en Mars 1626. & publié en Parle-
ment le sixième Avril audit an.*



A P A R I S,

Par A. ESTIENE, Premier Imprimeur &
Libr. ordinaire du Roy, rue S. Jacques, au
College Royal, deuant S. Benoist.

M. DC. XLIV.

Avec Privilege de sa Majesté.





LOUIS PAR LA GRACE DE
DIEU ROY DE FRANCE
ET DE NAVARRE, A tous
presens & à venir, Salut. Com-
me l'autorité souueraine ne re-
luit pas moins dans les actions de

grace & de clemence, que dans celles des armes
& de la Iustice, & que sçauoir vaincre & pardon-
ner, soit la plus haute marque de grandeur : Aussi
doit-on estimer le Prince digne d'honneur & de
gloire, lequel ayant donné cours à ses armes sur
ceux qui les auoient iustement attirées : & apres
les auoir soubmis & rangez en leur deuoir, se con-
tente d'exercer en leur endroit sa clemence, &
d'en faire recueillir les fruiçts au public par le
retablissement de la paix, qui fait que Dieu est
seruy & inuocé en tous lieux ; que l'autorité
Royale est reuerée & reconneuë de tous, que les
Loix sont religieusement obseruées, le peuple
soulagé, & que le corps de l'Estat vnissant ses for-
ces ensemble, est plus puissant pour sa conserua-
tion, & pour prester secours & protection à ses
Alliez. Ces considerations que nous auons tou-
jours eües deuant les yeux, nous ont donné su-
jet d'apporter autant de moderation, pour assou-
pir & esteindre les mouuemens qui ont agité di-
uerses fois ce Royaume, vsant de grace à l'en-
droict de ceux qui s'y estoient inconsiderément
precipitez, comme nous auons monstré de vi-

A ij

gueur, de fermeté & diligence pour les chastier & reprimer lors que nous y auons esté obligez. Quant aux affaires presentes, nostre conduite a esté telle, ayant employé les menaces & le chastiment aux lieux, qui ouuertement se sont declarez dans la desobeïssance, & la douceur, patience & remonstrance aux autres qui se sont contenus en deuoir, que nous auons retenu l'éclat du trouble dont cét estat estoit menacé par vne guerre intestine, & conserué la meilleure & plus grande partie de nos subjets de la Religion pretendüe reformée en la fidelité & obeïssance qu'ils nous doiuent : Lesquels auroient aussi clairement veu & connu, que nostre intention a tousiours esté, comme elle est encores, de les maintenir en paix, con corde & tranquillité, & les faire iouir inuio-
 lablement des graces à eux concedées par nos Edicts & Declarations. Ce que ceux qui ont leué les armes & les Villes qui les ont suiuy, ayant depuis peu bien consideré, & reconnu la qualité de leur faute, l'indignation publique, la ruine & le iuste chastiment qu'ils attiroient sur eux, continuans de troubler le repos de cét Estat ; ils auroient eu recours à nostre bonté, comme à l'unique refuge de leur salut, & nous auroient par leurs Deputez fait supplier diuerses fois, avec toutes les submissions que des subjets peuuent rendre à leur Roy, de leur pardonner & mettre en oubly les choses passées, & leur vouloir donner la paix. Surquoy nous inclinans plustost à la grace & clemence, qu'à la ruine & desolation de nos propres subjets : Ayans aussi égard aux suppli-

5.
cations tres-humbles qui nous ont esté faites au nom de ceux de la Religion pretenduë reformée qui sont demeurez en leur deuoir, à ce qu'il nous pleust receuoir les submissions des autres, leur pardonner en leur consideration, & les reünir tous en paix & concordé sous l'obeïssance qu'ils nous doiuent, nous protestant & asseurant qu'ils ne s'en departiront iamais pour quelque cause, pretexte ou occasion que ce soit. SçA VOIR FAISONS, que Nous pour ces causes, & autres grandes & importantes considerations à ce nous mouuans; De l'aduis de la Reyne, nostre tres-honorée Dame & Mere, des Princes de nostre Sang, autres Princes, Ducs, Pairs & Officiers de nostre Couronne, principaux Seigneurs & notables Personnages de nostre Conseil estans près de nous : Nous auons dit & déclaré, disons & declarons par ces presentes signées de nostre main, Voulons & nous plaist,

P R E M I E R E M E N T.

Que l'Edict de Nantes, Declarations & Articles secrets, publiez & enregistrez en nos Cours de Parlemens, seront inuiolablement gardez & obseruez, pour en iouïr par nos sujets de la Religion pretenduë reformée, comme ils ont bien & deuëment fait du temps du feu Roy nostre tres-honoré Seigneur & Pere, que Dieu absolue, & depuis nostre aduenement à la Couronne auparauint ces derniers mouuemens.

I I.

Que la Religion Catholique, Apostolique & Romaine, sera remise & restablie en tous les

lieux & endroits de nostre Royaume & païs de nostre obeïssance, où elle a esté intermise durant ces derniers mouuemens, pour y estre pleinement, paisiblement & librement exercée. Defendons tres-expressément à toutes personnes, de quelque qualité & condition qu'elles soient, sur peine d'estre punis comme infracteurs de paix & perturbateurs du repos public, de ne troubler, molester, ny inquieter les Ecclesiastiques en la celebration du seruice Diuin, & autres fonctions de la Religion Catholique, iouïssance & perception des dixmes, fruiçts & reuenus de leurs Benefices, & tous autres droiçts & deuoirs qui leur appartiennent: Et que tous ceux qui durant lesdits derniers mouuemens se sont emparez des biens & reuenus des Eglises appartenans aux Ecclesiastiques, leur en laissent l'entiere possession, libre & paisible iouïssance, conformément au troisiéme article de l'Edict de Nantes, & leur restituent les biens pris qui se trouueront en nature.

III.

Que l'exercice de la Religion pretenduë reformée soit restably aux lieux où il estoit estably suivant nosdits Edicts & Declaration en l'année 1620. Et seront nos subjects de ladite Religion pretéduë reformée remis esdits lieux, cōme aussi en leurs Cimetieres, aux endroits qui leur ont esté accordez, ou autres, tels que les Commissaires qui seront par nous deputez, ou Officiers des Villes, iugeront plus conuenables. Et où il arriueroit pour cause importante, que les Cimetieres ne pourroient pas estre restablis és lieux qu'ils

7

possedoient en l'année 1620. il leur en sera donné d'autres commodés aux despens de ceux qui demanderont ledit changement

I V.

Et pour rendre tesmoignage au public de la consideration en laquelle nous tenons ceux de nos subjets de la Religion pretenduë reformée, qui sont demeurez en la fidelité & obeïssance qu'ils nous doiuent, & des preuues recommandables qu'aucuns d'entre eux nous en ont rendus aux emplois que nous leur auons donnez en nos armées, tât dedans que dehors nostre Royaume ; Nous auons à leur tres-humble supplication, ayans aussi esgard aux submissions qui nous ont esté faites par les autres qui se sont éloignez de leur deroir, & de nostre grace speciale, plaine puissance & autorité Royale, quitté, remis, pardonné, quittons, remettons & pardonnons par cesdites presentes, toutes leuées d'armes, entreprises & actes d'hostilité commis par nosdits subiets de la Religion pretenduë reformée, de quelque estat, qualité & condition qu'ils soient, ensemble par les Villes qui les ont suiuy, & habitans d'iceles, tant par mer que par terre, depuis le premier de Ianuier de l'année derniere 1625. & precedés mouuémés, iusques au iour de la publication des presentes, en ce compris ce qui pourroit estre arriué dans l'interuale de la signature de la Declaration du 20. Octobre 1622. & la publication d'icelle en nos Cours de Parlemens, dont ils demeureront pleinement & perpetuellement deschargez ; Ensemble de toutes Assem-

blées generales & Prouinciales, Cercles, abrez, soufleurmens, esmotions populaires, excez, violences, infractions de sauuegarde, & de toutes autres choses generalmente quelconques contenues és articles 76. & 77. dudit Edict de Nantes, encores qu'elles ne soiēt pas icy particulierement declarées & exprimées; sans qu'ores & à l'aduoir ils en puissent estre aucunement recherchez, poursuiuis ny inquietez, fors & excepté les cas reservez, tels qu'ils sont specifiez & declarez par les articles 86. & 87. dudit Edict de Nantes, dont pourra estre fait recherche pardeuant les Iuges ausquels la connoissance en appartient.

V.

Et pour le regard des deniers qui ont esté imposez, leuez & pris sur nos subjects ou nos receptes, maniemens & administration d'iceux, & descharges des Comptables, ensemble ce qui concerne les debtes créées par les Communauttez de part & d'autre, & non payées; Les articles 74. 75. 78. & 79. de l'Edict de Nantes, seront gardez & obseruez.

VI.

Ce faisant, tous les Sieges de Iustices, Bureaux de receptes, & Officiers de Finances qui pourroient auoir esté transferez à l'occasion des presens mouuemens, depuis le mois de Ianuier de l'année derniere, & notamment le tablier de l'Election de la Rochelle, seront reestablis en l'estat qu'ils estoient. Les Villes qui sont tenuës par nos subjects de ladite Religion pretendüe reformée, iouiront des mesmes Priuileges, immunitiez, fran-

franchises, foires & marchez qu'elles faisoient auparavant. L'élection des Consuls y sera faite en la forme accoustumée, & en cas d'appel il sera releué en nos Chambres de l'Edict.

V I I.

Voulons pareillement que nosdits subjets de la Religion pretenduë reformée soient entierement deschargez des Jugemens, Sentences & Arrests donnez contre eux à l'occasion des presens mouuemens, suiuant les Articles 58. 59. & 60. dudit Edict, imposans sur le tout silence perpétuel à nos Procureurs Generaux, leurs Substituts, & tous autres qui y pourroient pretendre interest.

V I I I.

Ordonnons que tous prisonniers de guerre detenus de part & d'autre, qui n'auront payé rançon, seront deliurez & mis en pleine liberté sans en payer aucunes : declarans toutes promesses faites & causées pour rançon, qui n'auront esté acquittées au iour & date des presentes, nulles & de nul effect, sans toutesfois que l'on puisse pretendre que les rançons déjà payées puissent estre repetées: Comme aussi ceux de nosdits subjets de ladite Religion pretenduë reformée, saisis par autorité de Iustice, detenus en nos prisons ou en nos Galeres, à l'occasion des derniers & precedens mouuemens, mesmes ceux qui furēt pris à l'entreprise du port Louys, seront elargis & mis en liberté aussi-tost apres la publication des presentes, sans aucune remise, delay ny retardement.

I X.

Entendons pareillement, que l'Article 27. du-

dit Edict de Nantes, concernant l'admission & reception de nos subjets de ladite Religion pretendue reformee, aux Charges & Offices, soit gardé & obserué, & que tous ceux de ladite Religion, de quelque qualité & condition qu'ils soient, qui pourroient auoir esté destituez & priuez à l'occasion des presens mouuemens de leurs charges, Offices, dignitez, maisons & habitations depuis le premier iour de Ianuier 1625. y soient remis & reestablis: Comme aussi en tous leurs biens, noms, debtes, raisons, & actions, saisis, tant durant les precedens, que les derniers mouuemens, nonobstant toutes prouisions d'Offices, dons, confiscations, represailles, payemens, & quittances: Permettans aux creanciers de faire executer leurs contractz & obligations pour le sort principal, nonobstant tous Iugemens & Arrests, sinon qu'il fut interuenu Arrest definitif contradictoire pour ce regard en nostre Conseil, ou en nos Chambres de l'Edict, ou que les particuliers en ayent esté remboursez d'ailleurs.

X.

Voulons nos presentes Lettres de Declaration, estre gardées & obseruées par tous nos subjets, suiuant & en la forme prescrite par l'Article 82. dudit Edict de Nantes, & seront Commissaires par nous deputéz où besoin sera, pour faire executer le contenu en icelles.

XI.

A la charge que noldits subjets, faisans profession de ladite Religion pretendue reformee, ne pourront à l'aduenir tenir aucunes Assemblées

generales, ny particulieres, Cercles, Conseils, Abregez, & toutes autres de quelque qualité & condition qu'elles puissent estre, s'ils n'en ont expresse permission par Lettres, ou breuet signé de nous, & contresigné de l'un de nos Secretaires d'Estat : Et qu'ils se departiront de toutes pratiques, intelligences, vnions, & associations. Leur sont neantmoins permises les Assemblées de Consistoires, Colloques & Synodes, pour pures affaires concernans les Reglemens de la Discipline de ladite Religion pretenduë reformée, conformément à nos Lettres de Declaration, du 17. iour d'Auril 1623, expedies sur la tenuë des Colloques & Synodes, avec inhibitions tres-expresses d'y traiter d'aucunes affaires politiques. Qu'ils ne pourront faire à l'aduenir aucunes Fortifications, de quelque qualité qu'elles soient dans nos Villes, sans nostre expresse permission, portée par nos Lettres patentes. Qu'ils ne pourront leuer aucuns deniers sur nos subjets, pour quelque cause & occasion que ce soit, sans Commission emanée de nostre grand seau; le tout sur peine de crime de leze Majesté, & de déchoir de nostre presente grace.

XII.

Entendons aussi que les Articles par nous arrestez, pour ce qui concerne la Ville de la Rochelle, Isles & Pais d'Aulnis, soient gardez, obseruez, & executez incontinent & sans delay; & que les Villes & Chasteaux qui se trouueront auoir esté pris par ceux de ladite Religio pretenduë reformée depuis les presens mouuemens, soient remis en no-

stre obeïssance dans quinze iours apres la publication des presentes : Declarans ceux de nosdits subjets de ladite Religion pretenduë reformée, qui feront difficulté de se soubmettre à cette nostre volonté, descheus & priuez à leur esgard du benefice de cette nostre presente grace.

SI DONNONS EN MANDEMENT à nos amez & feaux les Gens tenans nos Cours de Parlemens, & Chambres de l'Edict, Chambres de nos Comptes, Cours de nos Aydes, Baillifs, Seneschaux, ou leurs Lieutenans, & à tous autres nos Iusticiers & Officiers qu'il appartiendra, Que ces presentes ils fassent lire, publier & enregistrer, chacun endroict soy, & le contenu en icelles garder & observer inuiolablement, suivant sa forme & teneur, sans y contreuenir, ny souffrir y estre contreuenue en aucune maniere. Enioignant à nos Procureurs Generaux, ou leurs Substituts, de faire pour cét effect toutes instances, poursuittes, & requisitions necessaires: Nonobstant tous Arrests, Lettres, & autres choses à ce contraires, Ausquelles & aux derogatoires des derogatoires y contenuës, nous auons derogé & dérogeons par celsdites presentes: C A R tel est nostre plaisir. Et afin que ce soit chose ferme & stable à tousiours, nous auons fait mettre nostre seel à icelles. Donné à Paris au mois de Mars, l'an de grace mil six cens vingt-six, & de nostre regne le seizième. Signé, L O V I S. Et plus bas, Par le Roy, D E L O M E N I E. Et à costé, V I S A. Et scellé du grand seau de cire verte, sur lacs de soye rouge & verte. Et encor est écrit;

Leuës, publiées & registrées, ony & ce requerant le Procureur General du Roy, pour estre executées, gardées & obseruées, selon leur forme & teneur, aux charges portées par l'Arrest du troisieme de ce mois: Es que copies collationnées aux originaux desdites Lettres, seront enuoyées aux Bailliages & Seneschaußées de ce ressort, pour y estre pareillement leuës, publiées & registrées à la diligence des Substituts dudit Procureur General, auquel enioint certifier la Cour auoir ce fait au mois. A Paris en Parlement, le Lundy sixieme iour d'Auril mil six cens vingt-six.

Signé, DV TILLET.

EXTRAICT DES REGISTRES de Parlement.

VEv par la Cour, toutes les Chambres assemblées, les Lettres Patentes en forme d'Edict, données à Paris au mois de Mars 1626. Signées, L O V I S. Et plus bas, Par le Roy, D E L O M E N I E. Et scellées en lacs de soye du grand sceau de cire verte; Par lesquelles & pour les causes y contenuës, ledit Seigneur veut & ordonne, que l'Edict de Nantes, Declarations & Articles secrets publiez & enregistrez en ses Cours de Parlemens, soient gardez & obseruez: Que la Religion Catholique, Apostolique & Romaine soit remise & restablie en tous les lieux & endroits de son Royaume où elle a esté intermise durant les derniers mouuemens; pour 'y

estre librement exercée, [avec defences de troubler, ny inquieter les Ecclesiastiques en la celebration du service Divin, & autres fonctions de la Religion Catholique: Que la Religion Pretendue Reformatrice soit pareillement restablie, suivant les Edicts & Declarations de 1620. Quit-
tant, remettant & pardonnant à ceux qui en font profession, tout ce qui s'est fait & passé pendant lesdits mouvemens, comme il est plus au long porté par lesdites Lettres: Requestes des Maire & Eschevins de la Ville d'Orleans, de François Godefroy, Gabriel Hurault & consors, Marchands de ladite Ville; & des habitans Catholiques de la Ville de Montpellier & lieux circonvoisins, Prelats, Ecclesiastiques, Gentilshommes & autres, & Jean Casseïrol leur Syndic, afin d'estre receus opposans à la verification dudit Edict. Conclusions du Procureur General du Roy, & tout considéré: LADITE COUR a ordonné & ordonne, Que lesdites Lettres en forme d'Edict seront leuës, publiées & registrées au Greffe d'icelle, pour estre executées, gardées & obseruées selon leur forme & teneur; A la charge neantmoins qu'en execution du 9. Article, les sommes payées en vertu des dons, confiscations, represailles ou autrement, ne pourront estre repetées, ains demeureront à ceux qui les ont receuës, sauf ausdits habitans dudit pais, à eux pourvoir sur leur opposition au Parlement de Thoulouse, & ausdits habitans d'Orleans faire executer l'Arrest par eux obtenu au Conseil Priué du Roy, le 22. Novembre 1625. Ordon-

ne que copies collationnées desdites Lettres
seront enuoyées aux Bailliages & Seneschau-
fées, pour y estre pareillement leuës, publiées
& registrées à la diligence des Substituts du Pro-
cureur General du Roy, qui certifieront la Cour
de leurs diligences au mois. FAIT en Parle-
ment le troisiéme iour d'Auril mil six cens
vingt-six.

Signé, DV TILLET.

